

# Լուկիանով - Գոքս Հանդիպումը եւ Ղարաբաղի Հարցը

Խորհրդային Միութեան Գերագոյն Խորհուրդի Նախագահ Անատոլի Լուկիանովը Յունիսի 13 ին Լոնդոնում հանդիպեց Անգլիոյ խորհրդարանի փոխ ատենապետուհի Բարոնուհի Գարուին Գոֆսի հետ: Գոֆսը վերջերս գտնուել էր Հայաստանում եւ մօտիկից ծանօթացել Ղարաբաղի հարցին եւ բռնագաղթուածների խնդիրներին:

Վերադառնալով Լոնդոն Բարոնուհի Գոֆսը յօդուածներ գրեց մի շարք թերթերում եւ հարցազրոյցներ տուեց մի քանի ռադիոկայանների: Յունիսի 11ին The Daily Telegraph թերթում տրուած յօդուածում նա գրում էր. «Մենք նախ խօսեցինք հայ զիւղացիների հետ, որոնք վերջերս բռնի տեղահանուել էին Լեռնային Ղարաբաղից եւ Ադրբեջանի այլ վայրերից: Նրանք պատմեցին, թէ ինչպէս խորհրդային բանակը եւ տիրահոռչակ ադրբեջանական ՕՄՕՆը - «սեւ զլխարկաւոր» ուժը - պաշարեցին եւ ուղղաթիւներով, տանկերով ու զնդացիներով յարձակուեցին զիւղերի վրայ: Մենք լսեցինք ականատեսների վկայութիւնները, թէ ինչպէս մարդիկ, ներառեալ մի վարդապետ, սպանուած են, տները բանդուած, սեփական ինչքերը կողոպտուած, ինչպէս կանանց ականջները կրտրել, ինչպէս կրակել են մի անդամալոյծ մարդու ոտներին՝ նրա կրնոջ առջեւ, ինչպէս են ձեծել յդի մի կնոջ եւ կրակել նրա ամուսնու թերանի մէջ, երբ փորձել է օգնել կնոջը...»:

Բարոնուհի Գոֆսը այս փաստերի մասին Մոսկուայում խօսել է Ա.Լուկիանովի հետ նրանց առաջին հանդիպման ժամանակ, որտեղ կողմերը պայմանաւորուել են, որ Խ.Միութեան Գերագոյն Խորհուրդը մի խորհրդարանական

պատուիրակութիւն ուղարկի Ադրբեջան եւ Հայաստան տեղեկագրելու կացութեան մասին:

Կողմերը պայմանաւորուել էին մի շարք այլ կէտերի գծով եւս, որոնց մասին Լոնդոնում Լուկիանովը Բարոնուհուն յայտնել է, թէ արդէն իսկ Հայաստանի եւ Ադրբեջանի նախագահների երկխօսութիւնը սկսուել է, ինչպէս նաեւ Մոսկուայում սկսուել է խօսակցութիւն Լեռնային Ղարաբաղի եւ Ադրբեջանի ժողովրդական պատգամաւորների միջեւ:

Բարոնուհին, սակայն, բարձրացրել է բռնագաղթուածների տուն վերադարձի հարցը, յայտնելով, «գիտեմք բաղաձայն իրավիճակը բարդ է, բայց մենք մտահոգ ենք մարդկային իրաւունքների խնդրով: Մենք ուզում ենք իմանալ Լեռնային Ղարաբաղից եւ Ադրբեջանից գաղթածների վիճակի մասին: Մենք ուզում ենք իմանալ, թէ նրանք երբ պիտի կարողանան վերադառնալ իրենց տները»:

Անշուշտ Լուկիանովը «չեզոքութիւն» ցուցաբերելով յայտնել է, թէ շուրջ 200,000 բռնագաղթուածներ կան իւրաքանչիւր կողմից, թէ ըստ հայերի կենտրոնը պրօ-ադրբեջանական է եւ ըստ ադրբեջանցիների՝ պրօ-հայկական, մինչդեռ կենտրոնը բոլորի հետ է եւ երկու հանրապետութիւնների միջեւ յաջողութեամբ ստեղծելով հինգ կիլոմետր տարածութիւնը՝ փաստօրէն նպաստում է իրադրութեան կայունացմանը, եւայլն:

Միւս կողմից, Բարոնուհի Գոֆսը շարունակում է հայանպաստ աշխատանքները անգլիական խորհրդարանում եւ արդէն իսկ կապեր է հաստատել տեղի հայ գաղութի հետ: